

四庫全書

史部

欽定四庫全書

史部

平定準噶爾方略正編卷三十五

詳校官監察御史臣孫家賢

通政使司副使臣莫瞻菴覆勘

總校官進士臣朱鈴

校對官編修臣周厚轅

謄錄監生臣汪瀾

欽定四庫全書

平定準噶爾方略正編卷三十五

乾隆二十一年冬十二月戊寅

定邊左副將軍成衮扎布奏報擒獲逆賊青滾

雜卜

土諭大學士曰據成衮扎布等奏稱參贊大臣納穆

扎爾帶兵追捕叛賊和托輝特青滾雜卜於十一

月二十八日追至俄羅斯交界杭哈將噶斯地方

擒獲現在派委官兵押解來京等語和托輝特青
滾雜卜乃喀爾喀部落之人自其祖父以來世受
本朝厚恩即此次用兵準噶爾亦專為保護伊等
游牧久遠之計伊既奉派出師自應倍加奮勉力
圖報効乃與阿逆私相交結竟自軍營逃歸伊部
將所有卡倫臺站悉行撤回復敢散布流言多方
引誘朕早洞鑒伊一人負恩背叛不過自取誅滅
其衆喀爾喀等必不致為其煽惑但此等逆賊若

不即行擒拏伊得竄身遠颺致稽顯戮亦何以彰
國憲而昭炯戒邪是以即命親王成衮扎布仍為
副將軍董衆討罪而親王成衮扎布等奉命進剿
實心協力迅速奏功深屬可嘉親王成衮扎布著
加恩賞給黃帶封伊子一人為世子以獎忠勤叅
贊大臣納穆扎爾帶兵追擒一聞逆賊所在疾馳
前進立為掩獲不致免脫甚為勇往出力著加恩
封為一等伯世襲罔替其在事大臣官員及蒙古

王公台吉等俱著交部從優議敘又

諭喀爾喀王公等曰前因逆賊青滾雜卜負恩叛逆
散布流言爾喀爾喀王公等間有檀回游牧者經
朕降旨宣諭爾等旋知悔悟各奉職守不致墮賊
術中今逆賊已經擒獲其前此黨同附賊人等應
分別治罪以彰國法第念喀爾喀王公等為國家
臣僕百餘年誤聽浮言致干罪戾並非有心附賊
俱著施恩免其查究嗣後益宜仰體朕恩漸滌前

愆約束所屬各安本業永受太平之福倘再罹法網朕亦不能曲為寬宥免之

命額外郎中蘇章阿管理達什達瓦所屬游牧事務
上諭軍機大臣曰富森經理達什達瓦游牧事務俱
未妥協著調往烏里雅蘇台辦理糧餉事務蘇章
阿著授為額外郎中遇缺即補前往達什達瓦所
屬游牧地方駐劄辦理

已卯

命叅贊大臣納穆扎爾查辦車臣汗部落事務

上諭軍機大臣曰青滾雜卜已經擒獲軍營無應辦之事所有車臣汗部落屬人齊木齊格特等及該部落肆竊為匪人衆伊等與俄羅斯接壤易生事端前已派瑚圖靈阿多爾濟等前往查辦著再派納穆扎爾前往會同巴扎爾什第德木楚克等即將此項人等嚴行辦理並著納穆扎爾帶侍衛四五員或於現在所撤索倫巴爾虎兵內調取五百

名或照前旨調呼倫貝爾兵丁五百名聽其酌量
納穆扎爾到日留濟福同辦事務瑚圖靈阿多爾
濟俱著回京辦事

辛巳

命安西提督傅魁領兵應援額敏和卓

上諭軍機大臣曰據黃廷桂奏稱額敏和卓遣子素
賚滿至哈密請兵救援伊保護游牧與賊相拒靜
候大兵前往等語額敏和卓拒賊固守甚可嘉予

著加恩封授貝子伊子素賚滿著賞給公品級以示獎勵現在傅魁已抵哈密馬得勝亦陸續領兵至彼即著傅魁選兵五百名帶同素賚滿馳赴額敏和卓游牧應援務將莽噶里克設法擒拏倘兵力不足即著額敏和卓帶領屬人同傅魁回至哈密俟大兵至彼再行辦理

命獎賞喀爾喀貝勒車木楚克扎布等

上諭軍機大臣曰此次擒拏青滾雜卜喀爾喀貝勒

車木楚克扎布奮勇効力其和托輝特貝勒旺布
多爾濟公多爾濟策登率領屬人奮力追捕俱屬
可嘉貝勒車木楚克扎布著加恩晉封郡王品級
旺布多爾濟多爾濟策登俱賞戴雙眼花翎以
示優眷仍俟成衮扎布造冊到日交部議敘

壬午

申諭安西提督傅魁領兵速進事宜

上諭軍機大臣曰昨降旨令傅魁帶兵赴援額敏和

卓並與額敏和卓密商辦理莽噶里克事宜今據雅爾哈善奏稱莽噶里克發兵二百名往助額敏和卓等語又與昨黃廷桂所奏情形不同但素賚滿來時並未言及莽噶里克助兵之事或因伊子白和卓未遣歸巢故有此舉實則首鼠兩端難以遽信著傳諭傳魁俟見額敏和卓時密與酌量情形如莽噶里克易於擒拏仍遵前旨辦理即助兵屬實亦係因救子起見且伊於和起被困時情罪

可惡不得少為寬假若果有効順之心尚可暫為
羈縻俟大兵至彼再為辦理惟聽額敏和卓相機
酌定傳魁接到此旨迅速前往毋得遲悞致失機
宜

命侍衛順德訥領兵先赴巴里坤

上諭軍機大臣曰內大臣博爾奔察赴烏里雅蘇台
揀選索倫兵丁前往西路進兵著先派兵五百名
交與侍衛順德訥即速馳赴巴里坤聽候調遣

癸未

命副都統唐喀祿等分駐地方督辦事務

上諭軍機大臣曰北路軍營大臣應分駐地方辦理
事務科卜多地方著唐喀祿阿桂駐劄辦事並著
郡王品級車木楚克扎布同往辦理舒明阿蘭泰
著隨同副將軍成袞扎布在烏里雅蘇台軍營辦
事

恩擢驛站効力人員

上諭軍機大臣曰據唐喀祿奏稱驛站委署主事哈琳等行走奮勉請旨加恩等語哈琳著授為主事遇缺即補滿泰著授為委署主事來京引見再降諭旨阿玉錫著賞給孔雀翎俟有參領缺出即行補授

甲申

申諭將軍大臣等前後疎縱逆賊罪狀

上諭大學士曰逆賊阿睦爾撒納脫逃策楞玉保等

畏縮推諉原欲拏至京師審明情節明正其罪乃
俱於途次遇賊被害今扎拉豐阿到京伊原係定
邊右副將軍績改授叅贊與策楞玉保同事因將
策楞玉保致脫阿逆各情節面加詢問據伊奏稱
玉保前進時即慮及不能拏獲阿逆向策楞商問
策楞令伊先行隨後即領兵策應後知阿逆已經
免脫彼時營內只餘四五日兵糧馬匹亦少諒力
不能追及是以回至伊犁等語玉保係領兵追捕

之叅贊大臣理宜竭力奮勇務期必獲乃於未去
之先預存退縮觀望之意其不肯勇往前進已可
槩見至策楞身為將軍當聞阿逆免脫時自宜兼
程追捕豈有反置之不問復回伊犁之理其意蓋
以追及阿逆而不能成擒獲罪滋大若僅不能追
及罪尚可諉其居心不良朕早已洞鑒又以拏獲
額林沁為足以委卸其罪不復奮勇前進即以額
林沁而論伊係阿逆黨羽年已衰邁設欲用彼力

以擒阿逆則當用計安慰如無可用之處應即行
正法收其游牧以濟兵力外此更無他策而策楞
等心懷怯懦不敢犯其游牧復將伊誘至軍營詐
稱擒獲實屬無恥再烏爾登乃領隊大臣與策楞
玉保同在軍營經朕召伊來京面詰據稱聞阿逆
脫逃之信即請發兵五百追擒玉保策楞俱以伊
妄希僥倖置之不理後伊隨同玉保前進復請兵
追擊玉保止發兵五十名伊同額爾登額追至庫

爾默圖嶺僅餘二十八人所騎駝隻又俱疲乏而
阿逆於伊起行之日已經過嶺竄入哈薩克境內
等語詢之扎拉豐阿據稱屬實核其情由阿睦爾
撒納初時之得以遠颺者皆由策楞玉保等存心
不良罔顧國事互相推諉所致至於此次兩路進
兵哈薩克追擒阿逆當分兵各進時尚知奮勉迨
至兩路會合每至牴牾更由伊等心存畛域不以
國事為重以致辦理一切俱失機宜種種悖繆不

勝枚舉又核計其由哈薩拉克至伊什勒椿集地方進兵時行走至五十日迨至撤回則又甚速是追擒逆賊反從容緩進如彼撤兵回日又迅速進行如此所謂勤勞王事者固如是乎至於兩路大兵屢敗哈薩克之後揀選兵馬前往擒拏阿逆時北路派出喀爾喀郡王策布登扎布西路派出阿里衮彼時達爾黨阿哈達哈扎拉豐阿策楞等俱在一處皆係將軍乃四人內曾無一人同往即或

於叅贊內派出亦當派諳練蒙古情形通曉蒙古
言語之富德唐喀祿等若阿里衮不惟於蒙古地
方不能諳練且不通曉蒙古言語乃令其與策布
登扎布前往是誠何心是明知阿逆業已遠颺斷
不能擒獲故令阿里衮一往以圖了事夫以朕所
信用之將軍大臣乃如此行事朕實憤懣再達爾
黨阿聞被擄臺兵逃出告知阿逆在前伊並不竭
力追擒及遇哈薩克兵時隊內忽有人來告阿逆

現在此處俟阿布賚到時即行擒獻之語達爾黨
阿即信而不疑不即進兵久之賊衆分散始覺其
詐追趕已屬無及設當遣人來告之時不為所愚
速行進擊阿逆未必不可就縛何竟受人欺誑至
於此極乎至哈達哈在後隊守護輜重營內報稱
有賊人形迹哈達哈即遣巴圖魯侍衛奇徹布往
追據奇徹布報稱已見賊形即催大隊兵丁前進
而哈達哈並不星速前往遲久始進設彼時哈達

哈能帶兵追及一同攻戰擒獲阿布賚亦可與哈薩克換取阿逆此又坐失事機之一端也在達爾黨阿哈達哈等兩次攻戰時朕亦非苛責其必能擒獲阿布賚與阿逆也但機有可乘而伊等才力不逮存心不堅以致屢失機宜朕實惜之又伊等奏請在哈薩拉克地方過冬明年派兵一萬及馬匹數萬駝隻數千等語伊等寧不知如許馬駝不能一時即赴縱使過行趲運而經歷長途能保其

必不疲瘦而故為此謬奏邪蓋欲表伊等並無撤兵之意第以所需軍行駝馬不能運送不得已而撤兵與伊等毫無干涉耳伊等俱係朕加恩授為將軍叅贊之人揆其伎倆即能和衷共濟事之成否尚在未定似此不以國事為要懷私岐視各占地步又安望其奏功策楞玉保罪孽滿盈致干天譴達爾黨阿哈達哈等此次遠赴哈薩克地方亦屬勤苦使伊等協力辦理即不能擒獲阿逆朕亦

必酌量加恩乃各挾已私深負委任茲以其行走之勞抵其應得之罪不另加譴責已屬朕格外施恩將此通行曉諭中外知之

丙戌

定邊左副將軍成衮扎布疏奏安插厄魯特人等事宜

成衮扎布等奏言臣奉

諭旨因阿逆未經拏獲所有來投厄魯特等未便遣

回原處致滋擾動仰見

睿慮周詳但此等人既不便盡遣至察哈爾安插若
留在烏里雅蘇台當差則又未識道路不知法
紀亦屬無益請於察罕度爾巴顏布拉克地方
令其耕種派員管轄毋許滋事如蒙

俞允懇賞給籽種二百石分給伊等以廣

皇仁奏入

上諭軍機大臣曰成衮扎布辦理安插厄魯特事宜

甚屬妥協第念此等人窮蹙來投是以加恩安插
果安靜無事則應給與籽種令其耕種自給倘稍
有可疑著成衣扎布即行勦滅或賞給喀爾喀等
為奴母得姑息滋事

命免治貝勒策卜登罪

上諭軍機大臣曰據成衣扎布奏貝勒策卜登從前
擅回游牧及擒賊青滾雜卜時又托病未往効力
甚屬可惡請革去貝勒其應襲公爵亦不准伊子

承襲等語策卜登係喀爾喀舊人年亦老邁前曾
著有勞績若按律治罪有所不忍著加恩免其拏
解來京治罪并免其革去貝勒至伊子齊旺多爾
濟或尚可造就仍著賞給公爵以觀後效

丁亥

命派哈密貝子玉素富屬人應援額敏和卓

上諭軍機大臣曰雅爾哈善等奏稱哈密貝子玉素
富遵諭遣人寄信額敏和卓令其相機辦理等語

玉素富甚屬可嘉賞緞四端以示鼓勵朕前命傅
魁領兵五百名前往額敏和卓游牧如兵尚不足
著即派玉素富屬人二三百名同往伊等既通語
言且識路徑較綠旗兵丁有益著雅爾哈善等遵
旨辦理

已丑

命授烏爾登三等侍衛仍著在乾清門行走
恩擢軍營効力侍衛濟塞布等

上諭軍機大臣曰二等侍衛濟塞布等此次効力軍營甚屬奮勇著加恩授濟塞布頭等侍衛賞給清巴圖魯名號奎瑪岱璵綽爾圖老格俱著授為三等侍衛奎瑪岱賞給伊德爾巴圖魯名號璵綽爾圖賞給固濟爾巴圖魯名號老格賞給博克巴圖魯名號並各賞銀一百兩海林泰占丕納瑪格俱著授為三等侍衛賞銀三十兩

命議敘遇賊奮勇副前鋒章京旺保祿等

上諭軍機大臣曰雅爾哈善等奏副前鋒章京旺保
祿及護軍校良音泰海福等解送軍營口糧回至
哈布塔克拜塔克地方遇賊五百餘人斬馘二十
餘人突圍而回等語旺保祿等遇賊奮勇甚屬可
嘉著交部議敘並著查明此次陣亡被傷人員交
部一體議卹旺保祿即馳赴來京詢問情形
命免治圖謝圖汗雅木丕勒多爾濟等罪

上諭軍機大臣曰圖謝圖汗雅木丕勒多爾濟當衆

喀爾喀擾亂之時既不督令扎薩克等効力伊子
旺親多爾濟復帶兵擅回游牧均應按律治罪第
念雅木丕勒多爾濟年已衰邁前已將盟長副將
軍革退著加恩仍留王爵旺親多爾濟著革去台
吉發往軍營効力

庚寅

申諭辦理莽噶里克事宜

上諭軍機大臣曰據黃廷桂奏額敏和卓呈稱莽噶

里克送到噶爾藏多爾濟印文令與呢嗎等同赴
羅克倫商謀叛逆莽噶里克並未前往等語此不
過因伊子白和卓未回謬為恭順之詞未可輕信
已令傅魁領兵會同額敏和卓密商辦理仍著傳
諭傅魁俟見莽噶里克時即諭知伊子現在肅州
並未加罪伊或親赴肅州即行拏解來京候朕辦
理至噶爾藏多爾濟印文俟奏到時查勘圖記或
係扎那噶爾布等捏造或實係噶爾藏多爾濟謀

為不軌立可查驗彼時另行降旨

辛卯

定邊左副將軍成袞扎布等疏奏安插和托輝

特部衆事宜

成袞扎布等奏言臣奉

諭旨著將青滾雜卜及策登扎卜屬人賞給臣及臣

弟策布登扎布暨桑寨多爾濟等管轄臣等不

勝感激查和托輝特所屬有葉克和托輝特巴

罕和托輝特明噶特哈柳沁斯奢集努特等
六鄂拓克並烏梁海十六鄂拓克此等皆屬無
知聽從逆賊後聞大兵將至即時解散尚知感
戴

皇恩倘蒙施恩仍歸入和托輝特四旗之內自必益
加感戴查旺布多爾濟係博貝嫡嗣公多爾濟
策登亦係博貝之姪伊等並未附和逆賊又和
托輝特台吉達什彭楚克亦係博貝之姪遣人

報知逆賊背叛情由尤屬誠心効力請將和托
輝特人等交與伊等管轄至策登扎卜往投逆
賊時其台吉諾爾布率衆至烏里雅蘇台報知
又在各臺站供應馬駝尚屬黽勉請將諾爾布
授為扎薩克台吉管轄策登扎卜屬人如此辦
理則伊等不致分離而旺布多爾濟等愈感
聖恩自必嚴加約束奏入

上諭軍機大臣曰從前命將青滾雜卜等屬人賞給

成衮扎布策布登扎布等管轄因伊等辦理諸務
俱合機宜用示獎賞今據成衮扎布奏請交與旺
布多爾濟多爾濟策登達什彭楚克等編設佐領
補授扎薩克嚴加約束一切安插事宜更屬妥協
著照所奏辦理

壬辰

駐劄巴里坤辦事大臣雅爾哈善等疏奏擒勦
沙克都爾曼濟情形

雅爾哈善等奏言臣等遵

旨詳察沙克都爾曼濟情形見其向內地設立卡倫
又屢遣人探聽巴里坤兵馬情形其屬人普爾
普首伊與扎那噶爾布等潛通信息並令伊前
赴巴里坤託病不至種種可疑顯有叛逆形跡
隨於十二月十六日派兵至伊游牧擒剿共斬
賊衆四千餘人以杜後患其赴京支領俸餉之
摩羅等尚未抵巴里坤已檄知沿途地方查拏

所有博爾和津等應解往肅州或應解京又巴里坤地方尚有布庫努特得木齊多爾濟所屬戶口二百餘人應否送至察哈爾安插俱候

諭旨遵行奏入

上諭軍機大臣曰雅爾哈善等察出沙克都爾曼濟背叛情形即領兵前往擒勦辦理甚屬奮往雅爾哈善前已補授內大臣此次著同李繩武錫特庫一併交部照軍功議敘丑達遇有總兵缺出即用

其副將員缺即著叅將閔相師補授其餘効力官員查明一體交部議敘博爾和津及摩羅等俱著解送來京多爾濟等戶口俱照所奏送往察哈爾安插

駐劄巴里坤辦事大臣雅爾哈善等疏奏遣兵應援額敏和卓情形

雅爾哈善等奏言據額敏和卓之子素賚滿告知莽噶里克等謀叛情形亟應發兵應援復詳

詢素賚滿知莽噶里克琿齊二人游牧與魯克察克毗連兵力無多可以即時擒剿惟巴雅爾游牧地方路徑稍險應先擒滅莽噶里克等再行辦理臣即派副將丑達叅將閆相師等領兵一千名於十二月二十四日起程前往魯克察克一切與額敏和卓相機辦理奏入

上諭軍機大臣曰雅爾哈善等據素賚滿告知賊人情形即派兵前往應援額敏和卓所辦甚合機宜

昨傳諭令傅魁帶兵五百名前往今丑達等即帶兵一千名赴援更屬有益其傅魁所領兵丁應否仍行遣往聽雅爾哈善等酌量辦理丑達等會同額敏和卓辦理莽噶里克之後即令駐劄吐魯番防守毋庸進剿巴雅爾倘巴雅爾領兵前來即行奮力擒拏至此項兵丁大半皆係綠旗究之不宜深入即使擒獲巴雅爾亦令伊等駐劄過冬一切事宜仍俟明春大兵前往辦理

乾隆二十二年春正月甲午

命成袞扎布為定邊將軍

上諭軍機大臣曰現在齊集大兵前赴巴里坤定期
三月內進剿將軍重任甚難其人成袞扎布熟悉
蒙古事務且深感朕恩誠心報効著授為定邊將
軍即帶領索倫兵丁二三百名由阿濟必濟前往
巴里坤並著賞給整裝銀五千兩其子弟內有願
帶往者聽其奏聞帶往北路事務亦屬緊要伊弟

策布登扎布才情幹練著暫行署理定邊左副將
軍印務此次進兵非初定伊犁可比現在賊勢窮
蹙擒勦甚易成衮扎布勤勞已久應示體卹俟進
兵擒獲首惡之日即速來京陛見毋庸久駐行間
一切善後事宜朕另派大臣等辦理舒赫德富德
鄂實俱著授為叅贊大臣色布騰巴爾珠爾阿里
衮明瑞額爾登額及侍衛舒布圖鎧巴圖魯奇徹
布等俱著在領隊大臣上行走

命傳諭都爾伯特汗策凌等防守游牧事宜

上諭軍機大臣曰大兵由西路進勦哈薩克錫喇等
勢窮力竭或逃往哈薩克亦未可定著傳諭都爾
伯特汗策凌等及內大臣阿克巴集賽宰桑達什
策凌各派兵防守游牧並通哈薩克地方隘口嚴
加堵禦倘遇賊人逃竄即行擒獻此特為保護伊
等游牧起見並非令其出兵會勦著副都統唐喀
祿親往策凌等游牧宣諭並派員明白曉諭達什

策凌知之

乙未

諭添派兵丁駐劄科卜多

上諭軍機大臣曰成衮扎布籌辦派兵防守各地方事宜俱屬妥協惟科卜多派兵五百名駐劄尚屬不敷彼處距阿爾台甚近各厄魯特等游牧相離不遠著於控圭扎卜堪等處所駐兵丁內派出五百名共兵一千名駐劄科卜多以資彈壓現命策

布登扎布署理定邊左副將軍印務即著策布登
扎布遵照辦理

丁酉

恩擢軍前効力侍衛英額爾圖等

上諭軍機大臣曰二等侍衛英額爾圖三等侍衛六
格奉恩將軍松年前鋒校扎爾畢善虛銜藍翎春
布禮等俱久在軍前効力英額爾圖著授為頭等
侍衛六格著授為二等侍衛松年著授為叅軍叅

領扎爾畢善春布禮俱著授為藍翎侍衛

戊戌

命侍衛圖倫楚等領兵先赴伊犁

上諭軍機大臣曰據雅爾哈善奏稱有自伊犁前來之察哈爾阿什達等告稱聞阿巴噶斯等屬人及布庫努特扎哈沁人等與副將軍兆惠交戰賊衆力不能敵等語此信既確亟宜遣兵赴兆惠處應援昨雅爾哈善等奏派侍衛圖倫楚等帶兵八百

名先往因兵數不多是以降旨停止仍令俟大兵齊集同進今據阿什達所稱不過窮蹙賊衆原易勦滅再得圖倫楚等領兵協助甚合機宜著即照雅爾哈善等前奏辦理毋庸停止

內大臣博爾奔察等疏奏選派兵丁駝馬事宜博爾奔察等奏言臣等於十二月二十二日至烏里雅蘇台傳

諭索倫副都統鄂博什等選派兵丁據稱現在所領

兵丁酌量揀選尚不足二千名其派往擒拏青
滾雜卜兵一千二百餘名正月初旬可到俟到
時即照數派往其現經揀選兵丁已給與口糧
器械即日啓行前赴巴里坤再軍營所有馬匹
尚不敷用已商同普慶阿思哈等令親王得親
扎卜遣員赴附近各部落揀選應用給予價值
令其即速解送奏入報

聞

已亥

命授哈達哈為叅贊大臣駐劄科卜多地方辦理事

務

諭綽羅斯汗噶爾藏多爾濟協擒逆賊事宜

上諭噶爾藏多爾濟曰巴雅爾哈薩克錫喇及回人

莽噶里克等負恩背叛莽噶里克等供稱與爾同

謀朕知爾受恩深重必無從逆之事今據雅爾哈

善等奏聞知爾於哈薩克錫喇等擾亂之前即遣

人往諾爾布處轉告知將軍兆惠有身受國恩斷
不從賊之言爾能深明大義輸誠報効深堪嘉尚
已令爾從前來使固穆扎卜隨將軍大臣前往遣
赴爾游牧地方現在大兵前進擒拏已雅爾哈薩
克錫喇等爾能遣派所屬人等協助將軍大臣擒
拏逆賊朕自加以厚恩並明白曉諭爾游牧內人
衆毋為逆賊煽惑自取罪戾免之母忽

命額林沁多爾濟之兄根扎卜多爾濟承襲貝子

上諭軍機大臣曰額林沁多爾濟貽誤軍務應革去
王爵不准承襲第念其祖父舊勲著加恩將伊王
爵降為貝子令伊兄根扎卜多爾濟承襲仍授為
扎薩克

庚子

諭定邊將軍成袞扎布等軍營事宜

軍機大臣等奏言臣等遵

旨將現在進兵事宜悉心籌議恭請

皇上訓示後錄交臣舒赫德帶往巴里坤會同將軍
成袞扎布妥協籌辦查軍行馬駝等項已屢次
傳諭黃廷桂解送巴里坤將軍成袞扎布等抵
巴里坤時所調北路索倫兵二千名及吉林察
哈爾兵各一千名阿拉善兵五百名陸續可到
以此兵力擒剿逆賊已足敷用但賊衆或在一
處游牧或散處額林哈畢爾噶等處尚應臨時
確查辦理如同在一處遵

旨令叅贊大臣富德領隊大臣阿里袞先行哨探將
軍成袞扎布統兵前進若散處各地方自應分
兵進勦現在調兵共四千五百名更派巴里坤
駐劄健銳營兵丁及察哈爾兵五百名每路用
兵二千五百名更屬有益副將軍兆惠現在領
兵二千名俟與大兵會合時應令成袞扎布兆
惠分為兩路帶同叅贊大臣等併力進勦務期
掃穴犁庭以靖邊疆兆惠處如有實心協力隨

大兵擊賊之厄魯特等臨時查明將伊屬人作何安插之處會同成衮扎布奏明辦理再查各臺站從前兼派厄魯特等在臺差委此次進兵將在臺滋事各厄魯特盡行勦滅嗣後惟應派察喀爾或兼用綠旗兵丁在臺差委方為妥協又今春伊犁種地應派綠旗兵丁即令巴里坤現駐綠旗兵二千名隨同大兵前進既可以聯絡聲勢並一路照看臺站俟至種地地方即酌

行存留秋收後運糧至大兵駐劄地方支給糧
餉其厄魯特賊人勦滅後所餘老幼人等悉照
從前安插無庸補放圖什墨勒扎爾呼齊及得
木齊收楞額各員伊等所有馬駝盡行收取惟
給與牛羊度日或派令索倫兵丁管轄編作旗
分佐領至駐劄大兵應在額林哈畢爾噶安濟
哈雅等處臨時相機辦理俾馬匹得以休息明
年再往擒拏阿逆其各回部事宜酌量遣人亦

於今年前往辦理奏入

上諭曰所奏甚屬詳悉俱應如所議行第軍機須相
時而動非可豫定惟在將軍大臣等和衷共濟奮
勇成功兆惠領兵前來若與成衮扎布同路進兵
辦理事宜俱應以成衮扎布為首倘需兩路進兵
則兆惠專領前往哈寧阿永貴等俱著在叅贊大
臣上行走但此時籌辦情形兆惠等俱未深悉著
鄂實會同兆惠辦理其兆惠所領兵丁已久在行

間應添派兵一二千名交額爾登額率領隨同兆
惠等進發至所議索倫兵丁前往新疆管轄厄魯
特事宜毋論遠道遷移事屬未便且索倫素屬驍
勇若與厄魯特聚處勢必染其餘習將來漸不可
用甚屬無益其厄魯特賊人餘衆應俱分賞綠旗
兵丁其實力協助大兵擊賊之人仍加恩令其管
轄所屬不必更設圖什墨勒扎爾呼齊等員酌量
賞給總管品級至前此厄魯特等擅行搶掠臺站

皆由派伊等同管臺站所致嗣後不必令伊等同
在臺站當差應指定地方令其游牧倘有潛入臺
站地方之人即行查拏究治其辦理各回部事宜
現在阿敏道尚在葉爾羌未回軍營著將軍等會
同額敏和卓詳細商酌或應再遣員前往曉諭即
派前次托倫泰五十六前往其波羅泥都霍集占
二人看來波羅泥都尚屬恭順霍集占奸詐異常
應留心防範相機辦理著將此旨抄寄成衮扎布

務期與軍營大臣等同心共勉迅奏膚功

恩擢軍營効力鄂里克塔等為侍衛

上諭軍機大臣曰此次隨同達爾黨阿等進兵之鄂里克塔寧固禮滿柱永安畢拉爾海俱著授為三等侍衛鄂里克塔著賞給哈朗圭巴圖魯名號滿柱著賞給布哈巴圖魯名號每人仍賞銀一百兩

辛丑

諭駐劄巴里坤辦事大臣雅爾哈善等確詢副將軍

兆惠情形

上諭軍機大臣曰據雅爾哈善等奏稱遣往策應兆惠之叅將邁斯漢回營擒獲叛賊得木齊納遜及厄魯特齊巴克默騰巴朗額色木拜等四人咸供兆惠現在被圍是以仍令圖倫楚等前往策應等語雅爾哈善等辦理甚合機宜唯是邁斯漢等領兵前往既經守備高天喜勦殺噶勒雜特哈薩克錫喇游牧人衆并收獲駝馬等物邁斯漢即應更

換駝馬徑赴厄卜推齊爾噶朗等處迎接兆惠乃
一聞被圍妄言即行退回殊屬懦怯著將邁斯漢
革職其叅將員缺即令奮勇効力之高天喜陞授
至納遜供稱哈薩克錫喇於十一月十五日已圍
將軍營盤之語看來竟屬子虛計和起與哈薩克
錫喇交鋒乃十一月初七日之事曾未一旬伊何
能即至彼處至巴朗所供尤屬荒唐著雅爾哈善
再行嚴加刑訊務究實在情形一面奏聞一面即

將納遜等正法

壬寅

命拏解莽噶里克逆黨阿舒爾瑪特等來京治罪

上諭軍機大臣曰雅爾哈善等奏拏獲莽噶里克偵探信息回人阿舒爾瑪特并同來之三達色等語阿舒爾瑪特為莽噶里克偵探消息已屬可惡三達色身係滿洲乃亦隨從探信尤堪駭異著傳諭黃廷桂將阿舒爾瑪特三達色并莽噶里克之子

白和卓即速解送來京治罪前已命傳魁帶兵會
同額敏和卓辦理莽噶里克着再傳諭傳魁令其
迅速辦理斷不得稍存姑息

平定準噶爾方略正編卷三十五

欽定四庫全書

平定準噶爾方略正編卷三十六

乾隆二十二年春正月癸卯

命總兵官存泰赴巴里坤軍營

上諭軍機大臣曰總兵官存泰丁憂回京著馳驛赴
巴里坤聽候調遣遇有總兵缺出即著署理

甲辰

命策凌孟克之子巴雅勒黨承襲郡王

上諭軍機大臣曰都爾伯特郡王策凌孟克貝子羅
壘原端布圖克森扎薩克台吉呢爾瓦齊等俱因
出痘身故策凌孟克等輸誠內附深感朕恩勉力
報効今聞溘逝深為軫惻著交部照例致祭派侍
衛瑚畢圖前往奠醊並加恩令策凌孟克之子巴
雅勒黨承襲郡王羅壘原端布圖克森並無子嗣
貝勒剛多爾濟貝子額爾德尼乃羅壘原端等族
人其所屬人等即交與剛多爾濟額爾德尼等管

轄呢爾瓦齊亦無子姪其扎薩克台吉著伊叔布
顏德勒格爾承襲

乙巳

命駐劄巴里坤辦事大臣雅爾哈善暫行回京

上諭軍機大臣曰舒赫德現赴巴里坤俟其到時即
著雅爾哈善來京面聆訓示並可看視伊母以示
體卹其大兵未進以前巴里坤一切事務俱交舒
赫德辦理進兵後著留阿里衮代辦俟雅爾哈善

回至巴里坤阿里衮仍赴軍營隨同將軍等辦事
命額敏和卓曉諭波羅泥都霍集占等

上諭軍機大臣曰據雅爾哈善等奏稱已令傅魁帶
兵一千名於正月初六日起程間道赴魯克察克
會同額敏和卓辦理莽噶里克等語所辦甚合機
宜傅魁等此時已應與額敏和卓會同滅賊如擒
獲莽噶里克時務遣幹員押解來京並著傅魁曉
諭額敏和卓俟霍集占所遣使人沙呢雅斯到時

仍遵前諭派五十六托倫泰一同回至葉爾羌喀
什噶爾額敏和卓或差人同往或寄信與波羅泥
都霍集占等告知恭噶里克獲罪伏誅並命伊管
理吐魯番回人各事宜即令波羅泥都等酌定貢
賦章程前來陳奏伊等遵行則已倘稍有推托俟
剿滅厄魯特後再派兵前往辦理

命授瑪璫頭等侍衛

上諭軍機大臣曰侍衛瑪璫從哈薩克回時中途遇

賊攻戰數次甚屬奮勇著加恩授為頭等侍衛仍
賜墨爾根巴圖魯名號賞銀一百兩馳驛速赴行
在再從前降旨令雅爾哈善等將回至巴里坤兵
丁即令各回本處今思此項索倫察哈爾兵丁途
中轉戰甫抵巴里坤即令各回本處轉非所以示
體卹且巴里坤存留此項兵丁亦屬有益嗣後陸
續自軍營前來兵丁著傳諭雅爾哈善等量加賞
賜給輿口糧暫留巴里坤不必速行遣回

丙午

命獎賞侍衛努古德等

上諭軍機大臣曰將軍和起所遣報信之索倫侍衛
努古德彭金布俱著賞銀一百兩努古德著賞給
額勒斯巴圖魯名號彭金布著賞給呼爾察巴圖
魯名號朕詢問伊等被圍情形據稱伊等出圍後
復有兵丁九十餘名同出遇賊攻戰經署章京巴
尼爾圖射退宰桑巴朗賊始散去等語著傳諭雅

爾哈善查明巴尼爾圖果屬奮勇即授為三等侍衛並奏聞錫以巴圖魯名號仍賞銀一百兩再兵丁九十餘人若能救護將軍同出自必懋膺上賞今僅以身脫無功可錄但伊等身出重圍亦屬奮勉其効力受傷之人並著查明量加賞賚至邁斯漢領兵策應退縮不前罪實難追著即拏解來京治罪

丁未

內大臣博爾奔察疏奏領兵赴巴里坤日期

博爾奔察奏言臣遵奉

諭旨派索倫兵五百名於正月初三日令侍衛順德
訥帶領先行至臣應領兵一千五百名若俟調
來兵丁揀選恐致遲悞即於總管溫布現在領
到兵丁及此處所餘兵內揀選一千五百名同
副都統鄂博什總管溫布亦於初六日起程奏
入報

聞

命議叙擒拏叛賊青滾雜卜効力人員

上諭軍機大臣曰據將軍成衮扎布遵旨將擒拏叛賊青滾雜卜大臣及喀爾喀王公台吉等分別奏聞著即交部議敘其喀爾喀二等台吉瞻布承衮扎布四等台吉衮布奮勇爭先尤屬可嘉著加恩授瞻布承衮扎布為一等台吉衮布為三等台吉並著賞給孔雀翎仍與効力人員一體議敘餘著

俱照前奏賞給緞疋銀兩至叛賊青滾雜卜遣往
烏梁海調兵之台吉丹珠爾從前為賊所迫已豫
行稟知軍營大臣後又同旺布多爾濟擒拏叛賊
著加恩免其治罪

戊申

命賞給哈尚德副將職銜馳驛前赴巴里坤交與總
督黃廷桂派在傅魁標下効力行走

庚戌

諭額敏和卓酌量留兵駐劄吐魯番事宜

上諭軍機大臣曰前降旨令傅魁領兵擒拏莽噶里克後留兵五百名駐劄吐魯番候大兵同行進剿今思擒拏莽噶里克之後其地即賞給額敏和卓管轄留兵在彼守候大兵尚需時日額敏和卓轉不無供應兵丁之費非所以示體卹著傳諭雅爾哈善等飭知額敏和卓如辦理莽噶里克事竣所留兵丁會同伊所屬回人力足以擒勦巴雅爾即

令其同傳魁領兵辦理否則即將內地兵丁全行撤回巴里坤不必在彼駐劄倘額敏和卓懇請留兵一二百名以為聲援亦從其便

辛亥

申諭叅贊大臣納穆扎爾查辦齊木齊格特人衆事宜

上諭軍機大臣曰前降旨令納穆扎爾赴車臣汗部落辦理齊木齊格特人衆事務此時應已前往齊

木齊格特人等原係喀爾喀貝子顏楚布多爾濟
屬人因伊不能約束妄生事端若不盡行剪除則
地方何由寧靜著查出為首倡亂之人即行正法
以昭炯戒餘亦無庸交該扎薩克管束即賞給喀
爾喀內曾經効力之人為奴伊部落內似此為匪
之人恐尚不少車臣汗瑪尼巴達喇年少無知不
能管轄著交與得木楚克加意查察倘有似此者
即嚴加懲治不得稍事姑息又前曾令納穆扎爾

俟辦理此事完竣後即行回京今已命成衮扎布
為定邊將軍馳赴巴里坤其烏里雅蘇台一切事
宜需人佐理納穆扎爾不必回京即協同郡王策
布登扎布辦理事務

壬子

命拏解莽噶克之弟糾羅卜伯克赴

行在審訊

上諭軍機大臣曰據侍郎衷曰修奏稱莽噶里克遣

伊弟糾羅卜伯克以押送噶爾藏多爾濟宰桑碧圖庫等為名潛至哈密卡倫外探聽信息經副將祖雲龍擒獲在衣縫中搜出書信已撥兵解送肅州等語糾羅卜伯克既係莽噶里克之弟又藏有書信潛至卡倫偵探其為奸細無疑俟其到肅時著黃廷桂即遴選員弁解送行在聽候審訊其書信一併密封進呈再前經降旨令將莽噶里克之婿阿舒爾瑪特等解赴行在此時當已起程途次

務須隔別防範並嚴飭解員小心看守毋致疎虞
命賞卹臺站陣亡受傷兵丁

上諭軍機大臣曰據唐喀祿奏稱自納米爾沙扎海
至古爾班察爾所設臺站兵丁七百餘名因烏梁
海等搶掠臺站各兵奮勇力戰內有陣亡兵三十
名受傷兵三十名又力戰未出兵丁一百四十名
等語此次生臺各兵勇往禦賊甚屬可嘉所有陣
亡應卹之人俱著交部照例議奏其力戰未出者

亦著加恩照陣亡之例一體議卹至受傷各兵著
照應賞銀兩加倍賞給

癸丑

命加增甘省輓運軍糧腳價銀兩

上諭大學士曰西路大兵指日進剿運送軍糧利在
迅速其腳價銀兩若照部議每石給銀一錢五分
恐不敷運戶往回之費所有甘省現在輓運軍糧
著照雍正九年例運糧一石每百里河西給腳價

銀二錢河東給脚價銀一錢六分以卹民力俟軍
務告竣各屬遇有撥補糧石仍照地方舊例辦理
命授內閣學士阿思哈為叅贊大臣協同署理定邊
左副將軍印務策布登扎布辦理事務
恩卹都爾伯特親王伯什阿噶什

上諭軍機大臣曰都爾伯特親王伯什阿噶什輸誠
內附具見悃忱令聞溘逝深堪憫惻著唐喀祿齋
銀三百兩前往策凌部落給與伯什阿噶什家屬

辦理喪事並齋茶酒往奠伯什阿噶什並無子嗣
著將伊兄子協理台吉達巴都噶爾封授貝子伊
第達瓦濟特封授公爵俱授為扎薩克其所屬人
衆即令此二人管轄伊等屬人無多或即歸入策
凌等部落居住或願移至內地並著唐喀祿明白
曉諭聽從其便奏聞辦理

諭署理定邊左副將軍印務策布登扎布等防範輝
特部落事宜

上諭軍機大臣曰據成衮扎布等奏稱輝特部落策卜登多爾濟普爾普德濟特等向巴蘭泰告稱阿逆雖與伊等同族惟是身受厚恩斷不致墮其詭計倘阿逆潛來煽惑必奮勇力戰擒獻治罪等語觀此則策卜登多爾濟等自無異志第恐其不免疑懼著傳諭策布登扎布哈達哈等止宜密為防範不得稍露形迹令其驚疑前已降旨令伊等仍往烏蘭古木地方種地一年再行遷移伊等不勝

感悅適經唐喀祿奏請將察達克等移至烏蘭古木地方俟輝特人衆遷移後即令察達克等居住此處若照伊所奏令察達克等同居一處在察達克等既須守候伊等遷移方得安居且現與輝特人衆同往一處轉啟伊等疑惑殊屬未便已降旨停止併傳諭策布登扎布哈達哈等知之

叛賊青滾雜卜之子車蘇隆多爾濟等正法

上諭軍機大臣曰據成衮扎布等奏稱叛賊青滾雜

卜之子車蘇隆多爾濟齊旺扎卜交與素尼勒圖
色楞額等解赴京師等語車蘇隆多爾濟齊旺扎
卜皆逆賊之子應即行處斬以彰國法著傳諭大
學士來保俟其解到即遵旨押赴市曹正法

甲寅

命議敘各省承辦送兵官員

上諭軍機大臣曰此次吉林察哈爾官兵經過直隸
河南陝甘等省兼程邁進一切車馬供頓料理俱

甚妥速該督撫及承辦各官均著交部議敘又據
陳弘謀奏陝省送兵夫役有檢獲兵丁遺失衣物
立即報官交還之事甚屬可嘉並著查明獎賞
命加恩賞賚派往軍營阿拉善兵丁

上諭軍機大臣曰貝勒羅卜藏多爾濟派領阿拉善
兵丁自備駝馬前赴肅州甚屬勇往可嘉所有應
給俸餉各項俱已照例賞給著傳諭黃廷桂酌量
加賞緞疋茶葉以示鼓勵

乙卯

申諭駐劄巴里坤辦事大臣雅爾哈善等遣兵策應

副將軍兆惠事宜

上諭軍機大臣雅爾哈善等接到朕停止圖倫楚等
進兵之旨即遣人追回圖倫楚等殊屬拘泥前因
邁斯漢等領兵前往是以降旨停止續聞邁斯漢
中路退回則圖倫楚等領兵接應甚合機宜即降
旨仍照所奏辦理今聞雅爾哈善等已於上年十

二月間遣圖倫楚等起程接到續奉諭旨相隔半
月諒難追及若圖倫楚等已經往迎兆惠固屬甚
善即使追回若尚未至巴里坤仍令其迅速前往
不必拘泥前旨辦理

戊午

定邊將軍成衮扎布疏奏派喀爾喀兵丁同赴
軍營事宜

成衮扎布奏言臣蒙

恩授為定邊將軍并令臣帶索倫兵二三百名前往
巴里坤臣隨行知領兵內大臣博爾奔察令其
留兵三百名在奈曼明安地方俟臣到彼處帶
往繼因衆喀爾喀等俱請効力戎行臣隨派喀
爾喀兵七百名賞給銀兩令其隨臣前往約計
三月十五日以前俱抵巴里坤奏入報

聞

定邊將軍成衮扎布疏奏採買馬駝事宜

成衮扎布奏言現在烏里雅蘇台科卜多兩處
雖有官馬二千餘匹駝一千餘隻俱係從遠道
回來不免疲乏今科卜多空圭等處駐兵二千
有餘西路復有辦理事件馬駝應須多備查烏
梁海恰克圖一帶地方可採買馬數千匹已遣
員帶銀八萬兩令其買馬六千匹駝數百隻以
備軍行之用奏入報

聞

己未

命叅贊大臣阿桂駐劄烏里雅蘇台辦事

上諭軍機大臣曰前令阿桂赴科卜多駐劄辦事今據將軍成衮扎布奏稱現在領兵前赴巴里坤所有烏里雅蘇台軍營一切事宜策布登扎布未能深悉暫留阿桂令其詳悉告知等語科卜多地方已命哈達哈前往駐劄阿桂著即留烏里雅蘇台辦事

庚申

命掣解提督傅魁來京審訊

上諭軍機大臣曰雅爾哈善等奏據署提督傅魁等呈稱帶兵一千名前至鹽池地方遇莽噶里克十三賊盡行勦殺等語莽噶里克係負恩背叛附和逆賊戕害將軍和起之首惡傅魁等帶兵圍往時應將伊父子生擒解送審明附逆背叛實情以正國法況領兵一千圍住三十餘賊生擒甚屬易

易並非賊人衆多交戰之際不能辨別賊首者可
比是傅魁之殺戮莽噶里克非特怯懦悖繆其中
不無別情著傳諭雅爾哈善即將傅魁等解來京
審訊等解傅魁後並將副將丑達解送來京以便
與傅魁質對再前曾降旨俟辦理莽噶里克後即
將吐魯番地方賞給額敏和卓管轄今莽噶里克
雖死應尚有伊妻子及平日任用之人即著額敏
和卓前往搜查向伊等究出莽噶里克率衆前來

實在情形具奏並著額敏和卓即揀選所獲馬匹
派委幹員前往探聽副將軍兆惠信息及厄魯特
等情形其遣人由何路前往并現在彼處所得信
息即著申報巴里坤大臣轉奏

訓諭大學士管陝甘總督黃廷桂等運送馬匹事宜
上諭軍機大臣曰據黃廷桂奏到札商雅爾哈善進
勦馬匹一摺未免彼此推諉殊非為國任事之道
而黃廷桂之過為大軍行非尋常可比全資馬力

臆壯經理大臣尤宜為兵丁等豫行籌畫是以朕
於舒赫德前往時面降諭旨令兵丁領馬後途中
酌量乘騎餘馬仍須餵養以惜馬力誠恐伊等不
知愛惜臨期至於疲乏今黃廷桂惟以支給兵丁
即了其責雅爾哈善又恐早收致疲試思此何等
事而可如此存心耶此項馬匹仍責成黃廷桂所
派員弁兵丁善為趕餵抵巴里坤時如送馬兵丁
不敷餵養雅爾哈善即酌派已到兵丁協同辦理

方為妥協總俟大兵起程交將軍等查驗分撥其
未起程以前倘有疲瘦皆黃廷桂之責馬匹一項
朕諄復降旨黃廷桂身任其事即現往巴里坤料
理亦職分所應乃以札商卸責將來進勦時稍有
貽誤惟黃廷桂是問黃廷桂雅爾哈善俱著傳旨
申飭

辛酉

命額敏和卓遣人曉諭霍集占

上諭軍機大臣曰前降旨令額敏和卓遣人送回霍集占所遣使人沙呢雅斯並令五十六托倫泰同往今莽噶里克已經辦理路徑已通著即遵照前旨遣往其從前兆惠遣往之副都統阿敏道現在何處著即曉諭霍集占等遣使送回

壬戌

諭定邊將軍成衮扎布等擒勒噶爾藏多爾濟等事宜

上諭軍機大臣曰雅爾哈善等審訊噶爾藏多爾濟
所遣宰桑布圖庫供稱噶爾藏多爾濟同扎那噶
爾布哈薩克錫喇尼瑪等謀叛屬實又稱兆惠帶
兵由招摩多前往阿爾台為塔本集賽宰桑達什
策凌中途邀截等語噶爾藏多爾濟如果無背叛
實情自當分別辦理然此等叵測之人難保其終
不生事今既與扎那噶爾布等同叛大兵前往即
將伊等盡行剪滅自可永絕根株至布圖庫所供

兆惠之信未必確實果爾則塔本集賽人等斷不
容貸亦應一體辦理前已降旨令將布圖庫解送
行在審訊實情另降諭旨著仍照前旨行至雅爾
哈善奏稱布圖庫所供各鄂拓克人衆俱不可深
信等語現在準噶爾當窮蹙之時其所有烏合之
衆不過如是布圖庫必不肯故為示弱以誘我兵
前進雅爾哈善心存怯懦所慮不免過當再傳魁
辦理莽噶里克一事其中必有別情已降旨將伊

拏問此次進兵若噶爾藏多爾濟扎那噶爾布哈薩克錫喇尼瑪等果在陣前立斃則已如可生擒則舒赫德等務將伊等擒解前來不得即行正法並傳諭成衮扎布知之

二月乙丑

諭署理定邊左副將軍印務策布登扎布等籌辦輝特人衆事宜

上諭軍機大臣曰據唐喀祿等奏稱輝特人衆自遷

至扎克賽地方自相搶掠甚不安靜且本係阿逆
親屬將來不免滋事請旨遷至呼倫貝爾齊齊哈
爾等處設有事端彼處密邇索倫辦理甚易等語
唐喀祿等所奏甚是輝特人等原非善類自應豫
行辦理但現在科卜多駐兵無多而伊等又無背
叛實據且與其遷至呼倫貝爾齊齊哈爾等處又
不如即行勦滅永絕根株著傳諭策布登扎布等
悉心查察如已有可疑形跡即將伊等勦滅倘尚

安本分應暫為安撫惟宜加意防範俟將來再行
辦理至唐喀祿所奏已勒濟得木齊懇請同塞卜
騰遷往察哈爾居住等語從前軍機大臣等議將
已勒濟屬人歸入輝特部落令在烏蘭古木種地
業經准行今已勒濟得木齊既願往察哈爾居住
俟其至烏里雅蘇台時即照唐喀祿所請賞給口
糧送至察哈爾地方安插不必仍照前旨辦理
命派兵查拏都爾伯特部落搶掠侍衛賊人

上諭軍機大臣曰成衮扎布等奏據遣往都爾伯特
致祭之侍衛佛保報稱中途遇嗎哈沁搶掠駝隻
現在勉力前進等語佛保係從前遣往致祭伯什
阿噶什之妻今伯什阿噶什亦已病故佛保即可
毋庸前往乃遇賊搶掠仍能奮勉行走甚屬可嘉
著查明係何等侍衛加恩陞用不必再行前往再
伯什阿噶什病故時朕加恩封伊弟姪貝子公爵
并授為扎薩克令其屬人等歸入策凌部落安置

因其懇請向內遷移復命唐喀祿詢問伊等情形
奏聞辦理今伊等既自相捨掠復敢剽奪奉使侍
衛駝隻則不惟不應加恩封爵亦毋庸任其向內
遷移著傳諭瑚爾起等俟帶兵到時即將剽奪侍
衛為首賊人盡行勦殺餘俱賞給喀爾喀等為奴
並著傳諭策布登扎布等遣人前往曉諭伊同部
落之貝子烏巴什等告知此次發兵特為擒治捨
掠侍衛之人至爾等尚屬安分可仍照伊從前所

請帶領屬人即赴都爾伯特汗策凌游牧同往仍
將伊等何時起程及情形如何詳悉奏聞

命侍衛順德訥領兵前赴軍營

上諭軍機大臣曰順德訥自烏里雅蘇台領兵赴巴
里坤行走迅速並奏聞即帶索倫兵丁前往剿賊
觀其情詞懇切甚屬可嘉著賞給舒倫巴圖魯名
號並賞銀一百兩即令其在軍營領隊前進副都
統職銜由屯亦屬勇往著加恩賞給大緞四端其

順德訥帶往官員著雅爾哈善等酌量賞賚兵丁俱著賞給錢糧一月以示鼓勵至頭等侍衛努三押送兵丁甫至嘉峪關即奏請回京已令其赴巴里坤候旨著將努三降為藍翎侍衛仍留巴里坤交與雅爾哈善等差遣委用

丙寅

命封定邊右副將軍兆惠一等伯爵並議敘奮勇勦賊大臣官員等

上諭軍機大臣曰據雅爾哈善等奏稱副將軍兆惠等遣領催雲多克等報稱於正月初五日至烏魯木齊途中殺賊千餘人其侍衛圖倫楚所領兵丁與兆惠相距止四五日又圖倫楚遣人告稱約二月初十日內即可同兆惠至巴里坤等語覽奏甚為欣悅前布圖庫供稱兆惠由招摩多前往阿爾台朕即知其言不足信今果由西路前來兆惠係駐劄伊犁等處辦事大臣適遇厄魯特等背叛奮

勇勦賊甚屬可嘉兆惠著封為一等伯世襲罔替
并將御用荷包玉韞鼻烟壺加恩賞賜三格哈寧
阿永貴莽阿納俱著賞給三等輕車都尉亦著世
襲罔替兆惠所遣報信之雲多克德倫徹俱授為
三等侍衛圖倫楚等所遣之副護軍校濟德著授
為護軍校圖倫楚達禮善此次亦屬奮勉著賞給
圖倫楚副都統職銜授達禮善為頭等侍衛奮勇
官兵著查明交部議敘並著照例賞賚所有陣亡

官兵著兆惠等查明交部議卹至健銳營委署前鋒校納蘭圖索倫委署章京成果達什達兀屬人色勒前往偵探擒勒賊人亦屬勇往著加恩賞給納蘭圖成果孔雀翎色勒授為三等侍衛仍各賞銀五十兩此時兆惠等諒已抵巴里坤軍營著會同將軍成袞扎布叅贊大臣舒赫德等悉心籌畫或兩路進兵或合為一路務期同心協力奮勇前往至進兵時索倫兵最為得力除兆惠等帶回受

傷兵丁毋庸調遣其餘兵丁仍酌量帶領前往並著發往孔雀翎藍翎各二十枝交兆惠等分賞奮勇効力官兵以示鼓勵並著於哈寧阿永貴三格三人內酌派一人馳赴行在備朕詢問厄魯特人等反覆無常實為覆載所不容至達什策凌與哈薩克錫喇尼瑪等同謀叛逆尤為罪不容逭其屬人必應全行勦滅不得更留餘孽今大兵自巴里坤分路進勦賊人等逃入烏梁海亦未可定著策

布登扎布等傳諭烏梁海內大臣察達克等加意
防範如有厄魯特逃至彼處即將首賊擒拏送烏
里雅蘇台將軍大臣辦理餘衆悉行擒治毋任脫
逃再據坐臺厄魯特孟克告稱解到羊五百隻遇
一索倫官員搶去在臺之察哈爾等亦俱隨往又
千總策布登同臺站筆帖式俱往噶爾藏多爾濟
游牧未回等語索倫官員及隨往之察哈爾究係
何人策布登等因何潛往噶爾藏多爾濟游牧現

在何處俱著兆惠等查明具奏

諭副都統唐喀祿擒拏達什策凌事宜

上諭軍機大臣曰前加恩賞給達什策凌屬人口糧
令唐喀祿傳諭令據唐喀祿奏稱現赴策凌等游
牧辦事其傳諭達什策凌事宜派侍衛烏林泰前
往等語現在達什策凌同謀叛逆烏林泰不必遣
往著即行追回此時達什策凌或親來領取口糧
或遣人前來唐喀祿即行擒拏解送來京治罪

戊辰

諭定邊將軍成袞扎布等辦理衆厄魯特事宜

上諭軍機大臣曰兆惠咨雅爾哈善文內有厄魯特等反覆無常應盡行剿滅之語兆惠目擊彼處情形所籌甚是從前朕已向舒赫德面降諭旨伊二人見將軍成袞扎布時悉心籌畫務宜妥協辦理此等賊人斷不宜稍示姑息惟老幼羸弱之人或可酌量存留另籌安插前此兩次進兵皆不免過

於姑容今若仍照前辦理則大兵撤回伊等復滋
生事端前事可為明鑒即如厄爾錫音吞圖布庫
圖齊等此際雖未敢妄動而當兆惠被圍時並未
見前來策應此次進兵務將伊等解送來京或姑
免其死給與効力之處已屬格外施恩倘稍有可
疑亦一併擒拏治罪著傳諭成衮扎布兆惠舒赫
德等遵照辦理倘兆惠所見或有不同之處亦即
與成衮扎布等一面議定一面奏聞伊等務即奮

勇前進迅奏膚功以副委任

定邊將軍成衮扎布疏奏派台吉諾爾布管理
科卜多臺站事宜

成衮扎布等奏言前臣等奏派公齊旺辦理科
卜多臺站事務今齊旺病篤不能任事其公爵
請將伊子達什承襲查扎薩克圖汗部落台吉
諾爾布已蒙

恩授為扎薩克其游牧與科卜多相近請即派諾爾

布駐劄科卜多管理臺站事務奏入報

聞

已已

命獎賞奮勇勦賊之總管溫布等

上諭軍機大臣曰據雅爾哈善等奏帶領索倫兵丁
總管溫布等沿途遇賊搶掠喀喇烏蘇臺站奮勇
擒勦等語溫布等帶兵前進中途遇賊即行擒勦
甚屬可嘉溫布著賞銀一百兩藍翎侍衛烏爾袞

保著陞授三等侍衛索倫佐領魁蘇岱吉克達爾
圖俱著賞給孔雀翎仍各賞銀三十兩其奮勇兵
丁俱著賞錢糧一月以示鼓勵


庚午

諭署理定邊左副將軍印務策布登扎布等安插郭
莽胡土克圖之沙畢納爾等事宜

上諭軍機大臣曰據成衮扎布等奏郭莽胡土克圖
之沙畢納爾等四百餘人請送至阿拉善交羅卜

藏多爾濟管轄等語此等人本非誠心歸順特因窮困無聊暫行依附日久必復滋生事端即如伊等在伊犁時留養司員栢琨等後阿逆遣人至彼隨將栢琨等送往伊等既經歸誠即不應順從阿逆乃反覆無常一至於此自應豫籌安插著傳諭策布登扎布等即將伊等大喇嘛解送來京應令其何處居住再行定奪其沙畢納爾等俱著交哲卜尊丹巴胡土克圖管轄留心約束毋得任其滋

事



平定準噶爾方略正編卷三十六